

Date : 8 March 2023
Headline : RM2 billion untuk biayai PKS urus pelepasan karbon
Author : NIL
Source : Sinar Harian

RM2 bilion untuk biayai PKS urus pelepasan karbon

KUALA LUMPUR - Program Penghijauan Rantai Nilai (GVC) akan membolehkan pembekal mengakses Kemudahan Peralihan Rendah Karbon (LCFT) Bank Negara Malaysia (BNM) berjumlah RM2 bilion untuk membiayai modal kerja perusahaan kecil dan sederhana (PKS) atau perbelanjaan modal yang berkaitan dengan amalan rendah karbon pada kadar berpatutan, kata Kossan Rubber Industries Bhd.

Pengarah Urusan dan Ketua Pegawai Eksekutif Kumpulan, Tan Sri Lim Kuang Sia berkata, program itu bertujuan membantu dan memberi insentif pengurusan pelepasan karbon dalam kalangan pembekal PKS Kossan, menjadikan mereka pembekal PKS strategik Kossan.

"Program ini merupakan situasi menang-menang untuk pembekal strategik kami dan Kossan, yang turut memberi manfaat kepada alam sekitar," katanya ketika berucap pada majlis pelancaran rasmi program GVC di sini pada Selasa.

Lim berkata, kesan alam sekitar industri pembuatan menyumbang 13 peratus daripada pelepasan karbon negara atau

kira-kira 32.5 juta tan karbon dioksida yang dihasilkan setiap tahun.

Justeru, beliau menambah ini memerlukan komitmen, kerjasama dan penyertaan daripada semua entiti untuk mencapai matlamat menjadi negara neutral karbon seawal 2050.

"Kami komited untuk menjadi syarikat berdaya tahan karbon dan ingin memanjangkan pelaburan DNA Hijau ini kepada rakan kongsi rantai bekalan strategik di bawah Program GVC," katanya.

Sementara itu, Penolong Gabenor BNM, Suhaimi Ali dalam ucapannya berkata, sebagai negara pengeksport, Malaysia perlu bersedia untuk mengetatkan peraturan berkaitan iklim yang mungkin dikenakan oleh rakan dagangnya.

"Menurut penemuan laporan oleh Institut Kewangan Lestari Asia 2022, PKS berpotensi untuk kehilangan hasil sebanyak RM292 bilion disebabkan oleh pematuhan bukan ESG," katanya.

Suhaimi berkata, tanpa sokongan yang diperlukan, cita-cita untuk mencapai sifar bersih akan menjadi amat sukar untuk PKS. - *Bernama*